

**Massimo Minella, 1914 - *L'esposizione Internazionale di Genova - Il futuro nella storia*, De Ferrari, Genova 2014, pagg. 136**

Ne-o mentre che se preparava, con tanto sciato, l'Espò de Milan de quest'anno, l'aotò o l'è vosciù ricordà 'n atra esposiçion, quella fæta a Zena çent'anni fa e ch'a l'ea cheita into posso de memöie pèrse, fòscia anche pe corpa da goæra mondiale scciupà pròpio inte quel'anno.

Questo libbro o-a descrive ben, con tante fotografie de l'època, e o fa notà comme Zena aloa a fise pronta a cheugge e novità e rapida into realizale: basta pensà a-a monorotaia ch'a l'anava da ciassa de Fransa (òua da Vitòia) a-o meu Giano, e a-a funivia (a primma in Italia!) ch'a portava i vixitatoî in sce-e miage de Caignan pe mostraghe l'esposiçion e a çità da l'èrto.

E a prefaçion do Federico Rampini, con analogie e confronti tra o pasòu e o prezente, a fa ben ben riflète.



**Mirco Pastorino, *La Madonna della Guardia raccontata ai più piccoli*, Cerànesi (GE) 2015, pagg. 24**

L'aotò o l'è 'n zoenòtto de Livelòu, comune de Çiànexi, che avendo fæto l'Artistico o l'è bon de disegnà; esendo cresciùo "a pan e Madònna da Goardia" o l'è misso insieme e doe cöse e o l'è fæto questo bello libretto illustròu pe-i figeu picin, dove o fa contà a stòia de l'Apariçion ninte de meno che da-a Madònna! E pe de ciù o-a fa parlà co-o Beneito Pareto in zeneize, perché de seguio quella a doveiva èse l'unica lengoa che quello pövio òmmo o poèse acapî. Insomma, in travaggio ben ben òriginale, ch'o l'è piaxùo tanto a-o cardinà Bagnasco da fâghe mette inta primma pagina a sò benediçion!



**Franco Bampi, *Modi di dire genovesi - 1233 modi di dire tradotti e commentati con la pronuncia di tutte le parole genovesi*, Ligurpress, Genova 2015, pagg. 224**

Dòppo i Provèrbi (boletin 1/2013) e-e Barzelette in zeneize (boletin 1/2014), o nòstro prescidente o l'è completòu a *trilogia* co-i Moddi de dì, ch'en i ciù inportanti da sarvâ perch'en i primmi a pèrdise de maniman che scenta a gente ch'a parla zeneize. Pe fortun-a i ciù tanti mòddi de dì èan za stæti registræ da-o Casaccia inti seu vocabolai, ma gh'è vosciuo 'na bèlla paçiensa pe çercali, tiâli feua tutti, azùnzighene ben ben di àtri e trascrivili in mòddo da poèili atreuvâ façilmente con l'agiutto de l'indice analitico.

A prefaçion a l'è do Gilbèrto Vorpæa (Volpara) e o nòstro zoenò sòccio Féipo Nòceti o gh'à azonto 'n interessante apendice in scî deslìgalengoa in zeneize, saia a dì in italian *scioglilingua*.



**Riccardo Dellepiane, *Mura e fortificazioni di Genova*, Nuova Editrice Genovese, Genova 1984-2008, pagg. 318**

In libbro no pròpio recente, ma ch'o l'ea stæto ristanpòu e o s'atreuva ancon perché o l'è ben fæto e ben ben interessante, e òua asci d'atoalità: l'òtobre pasòu, defæti, l'è stæto firmòu 'n acòrdio co-o quæ o Demanio o s'inpegna a restitòi a-o Comune de Zena o sò scistema de fòrtificaçoin, perché se pòsse rendilo, comm'o merita, 'n atraçion turistica pe-i foresti e pe-i zeneixi asci.

L'aotò, vègio sòccio d'A Compagna apascionòu de cöse militari, o l'è mancòu do 2009: questo libbro preçiozo o l'è fruto de tante òe ch'o l'è pasòu inti archivi, ricostruindo da-o prinçipio, con tanti disegni e fotografie asci, tutta a stòia de òpie difensive de Zena, da-e primme de Castello finn-a a quelle che vedemmo òua.

